

ZELENOVIĆ I DALJE U RUSIJI

Author: [IWPR](#)
[ICTY](#)

Izvori iz Haškog tribunala tvrde da je Moskva zbog Miloševićeve smrti odložila prebacivanje posljednjeg optuženog za zločine u Foči.

BIRN – JUSTICE REPORT – 05.04.2006 – Prebacivanje Dragana Zelenovića iz pritvora u Rusiji u pritvorsku jedinicu u Scheveningenu, odloženo je zbog smrti Slobodana Miloševića, saznaje BIRN-ov Justice Report.

Prije deset godina, Međunarodni krivični sud za bivšu Jugoslaviju (MKSJ) podigao je optužnicu protiv Dragana Zelenovića, u kojoj se on tereti za zločine protiv čovječnosti i kršenje zakona i običaja rata, te zlodjela počinjena nad civilima u Foči.

Poslije devet godina provedenih u bjekstvu, u augustu 2005. godine vlasti Ruske Federacije, uhapsile su četrdesetpetogodišnjeg Zelenovića.

Uhapšen je u naftnom gradu Kanti-Mansisk u zapadnom Sibiru, gdje je više godina radio kao građevinski radnik pod pseudonimom Petrović.

Poslije hapšenja, Tribunal je poslao zahtjev ruskim vlastima tražeći njegov «brzi transfer» u Hag.

Izvor iz Tribunala je potvrdio za Justice Report da se Zelenovićev transfer iz Rusije očekivao 13. marta. Međutim, poslije Miloševićeve smrti, ruske vlasti su odlučile odložiti prebacivanje.

Hag još nije potvrdio ove navode. «Tribunal nastavlja suradnju sa ruskim vlastima i nadamo se da će pitanje Dragana Zelenovića biti uskoro razriješeno», rekao je Matijas Helman, predstavnik MKSJ u Bosni i Hercegovini za Justice Report.

Zelenović je bio komandant vojne policije i vođa paravojnih formacija u Foči. Optužen je za više pojedinačnih silovanja, za učešće u višestrukom silovanju i odvođenju žena radi seksualnog zlostavljanja i mučenja.

Optužnica protiv njega je prvi put podignuta u junu 1996. godine zajedno sa optužnicama protiv Gojka Jankovića, Radovana Stankovića, Dragoljuba Kunaraca, Radomira Kovača, Zorana Vukovića, Dragana Gagovića i Janka Janjića.

Tužilaštvo je 2004. godine zatražilo od Tribunala da se Zelenovićev slučaj prebaci Vijeću za ratne zločine u Sarajevu, a u skladu sa strategijom završetka rada Haškog tribunala. Po tim pravilima, druga dva haška optuženika iz Foče, Radovan Stanković i Gojko Janković, već su prebačeni na Sud BiH.

Nikakva odluka o prebacivanju Zelenovićevog slučaja na sud u Bosni neće biti donijeta prije njegovog prebacivanja u Hag.

Zelenović je u pritvoru u Rusiji već više od osam meseci.

Od osmorice koje je 1996. godine Haški tribunal optužio za zločine počinjene u Foči tokom rata u BiH, Dragan Zelenović je posljednji koji je uhapšen. Trojici je već suđeno i izrečena je presuda, dvojici se sudi u Sarajevu, a dvojica su ubijena pri hapšenju zbog pokušaja bjekstva.

Nerma Jelačić je direktor BIRN-a u Bosni i Hercegovini.

Focus: International Criminal Tribunal for the former Yugoslavia

Source URL: <https://iwpr.net/sr/global-voices/zelenovic-i-dalje-u-rusiji>